

RvA cu critica riba plannan financiero di gobierno nobo di Aruba

E gobierno nobo di Aruba ya caba ta bou di presion debi n'e plannan financiero proponi pa 2025. Raad van Advies (RvA) a expresa remarkenan fuerte riba diferente medida cu e gabinete kier implementa. Segun e Raad, hopi plan no ta bon pensa y falta un base concreto.

E critica di RvA ta bin na un momento delicado, mirando cu e Raad mes a bin bou di presion anteriormente dor di e gobierno demisionario cu a cuestiona integridad di e presidente di RVA di un posibel conflicto di interes pa cu e proceso di screening di e siguiente minister-president. E independencia di e Raad a wordo cuestiona e tempo ey, pero e siguiente gobierno mester tuma e consehonan di RVA y su integridad na serio.

Reduccion di accijns di combustibel ta lanta preguntanan

Un di e medidanan mas controversial t'e reduccion di accijnsnan riba combustibel. Gobierno kier alivia e presion financiero riba ciudadanonan cu esaki, pero segun e Raad e acercamento aki ta contraproduktivo tanto economicamente como ecologicamente.

Reduci e gastonan di combustibel ta stimula juist e consumo, loke ta bay contra e metanan ambiental di e isla. Ademá, segun RvA, e ta duna apenas beneficihonan remarcabel pa mayoria di hogar.

Aumento di pago na pensionadonan no ta husto

Un otro medida cu ta topa cu critica t'e aumento di e suplemento mensual pa pensionadonan. Gobierno kier mehora e poder di compra di adultonan mayor cu esaki, pero RvA no ta haya esaki husto. Otro gruponan vulnerabel ta



wordo exclui cu esaki, loke ta lanta preguntanan riba e distribucion husto di fondonan. E Raad ta propone pa, en bes di un aumento specifico di suplemento, scoge pa un aumento general di e pago di AOV, pa tur adulto mayor wordo trata igual.

Inversion indefini y gastonan di personal

Gobierno tin plan tambe pa inverti 30 milyon florin extra den economia, pero falta un plan concreto unda e placa aki ta bay. RvA ta pidi mas transparencia y un vision cla prome cu e inversion aki wordo aproba. Sin metanan concreto, e riesgo ta menasa cu e placa no ta wordo uza efectivamente.

Ademá, gobierno kier spaar riba gastonan di personal door di reduci e cantidad di ambtenaarnan. Sin embargo, e Raad tin duda riba e posibilidad di realisa e medida aki, pasobra un reduccion grandi di e aparato di ambtenaar por mina e calidad di e servicio publico. Nan ta pidi un acercamento realistico cu ta garantiza cu e servicio ta keda garantiza.

Falta di transparencia den subsidionan

E maneho rond di subsidionan tambe ta lanta preguntanan. RvA ta haya cu tin transparencia insuficiente riba otorgamento di subsidionan na organisacionnan social. E maneho actual ta parece arbitrario y indefini, loke ta perhudica e credibilidad di gobierno. E Raad ta boga pa criterianan cla y un procedura transparente pa reestablece confiansa.

E critica di RvA ta bin na un momento cu e independencia di e Raad mes ta na discusion. Den pasado recien, e Raad a wordo involucra den weganan politico, unda screening di e minister-president a resulta di ta un punto delicado. Pa garantiza e credibilidad di gobierno, segun observadornan ta di sumo importancia p'e gobierno nobo tuma e consehonan na serio y no uza nan como instrumento politico. E gobierno nobo awor ta enfrenta e reto di revisa e maneho financiero y presenta plannan concreto. Cu e critica fuerte di Raad van Advies den mente, tin un tarea importante pa garantiza e estabilidad di Aruba y reestablece confiansa di e poblacion.